


Pa motibo di problemanan social alarmante na Aruba

E aña aki SKOA a haya nan ta amplia nan departamento di cuida

ORANJESTAD -- SKOA (Stichting Katholiek Onderwijs Aruba) tin un departamento di cuida cu e aña aki a wordo amplia pa motibo cu e problemanan social den nos comunidad ta alarmante. "Hopi biaha nos ta bisa e mucha no a haal su diploma, pero nos tin cu bay wak e ori-

gen pakico e mucha no a haal su diploma ya cu mayoria bes esaki ta un problema social cu tin na cas, cu tin un influencia negativo riba e alumno su prestacion na scol," Sra. Aguanette Gunn di SKOA a remarca.

RELACIONAN EXTERNO



SKOA tin funcionarionan pa scolnan secundario interno pero tambe tin relacionnan cu otro instancianan externo. Gunn ta subraya cu nan ta trahando incansablemente pa yuda e muchanan cu ta haya nan confronta cu problemanan social.

DIVERSO

Problemanan cu mas SKOA ta experiencia cu studiantenan ta entre otro, muchanan cu no tin hende cu tin nan tutela (cobertura/proteccion). Otro problema comun ta maltrato fisico, maltrato psicologico. Adiccion na droga, alcohol como tambe na relacion sexual. E ta algo masha diverso, Gunn ta remarca.

ADICCION

SKOA tin un protocol cu ora cu un mayor ta bay inscribi na tur e cinco scolnan di MAVO, e mayor tin cu firma esaki. E protocol aki ta encera, cu si scol tin un sospecho cu un estudiante ta bou di influencia di sea droga of alcohol, e estudiante ta wordo 'getest'. Si e resultado sali positivo, e hoben tin cu pasa un trayecto caminda e tin cu rehabilita di su adiccion.

"Tin un vigilancia continuo unda atrobe e funcionario di cuida ta cay den e rol aki, y e ta esun cu lo bay mantene contacto directo cu e instancia externo pa wak si tur cos ta bayendo bon. Esaki no ta un encuentro di un solo biaha, pero e mucha tin cu pasa den un proceso. Kiermen nos tin un control basta severo pa cu esaki," Gunn a splica.



Sra. Aguanette Gunn di Stichting Katholiek Onderwijs Aruba (SKOA).

REHABILITACION

Si un mucha wordo gara cu droga, SKOA no ta kita e mucha for di scol, pero mester busca pa sa kico ta e motibo cu a conduci cu e hoben a termina di uza droga. Asina SKOA ta prefera di traha mas bien na e parti di 'rehabilita-

cion' cu e hobennan.

EXIGENCIA

Gunn ta remarca cu un docente no ta coba den un hoben su tas, pero si ta necesario e por existi e hoben pa habri su tas y saca tur cos afo, kita su keds, kita su meya y haci e saconan di su jeans bashi. □

